



S-chodamaint chasa da scoula Lavin - dumonda da princip e surdatta lavurs d'indschegner

Il s-chodamaint da la chasa da scoula Lavin sto per motivs d'età e sfrusch gnir rimplazzà. La lavur d'indschegner es gnüda surdatta a Torsten Hartmann, Grüşch.

Zernez, Viel - sanaziun infrastruttura - decisiun da princip e glista da submittents

L'infrastructura cumünala sco eir privata es in üna part dal quartier Viel in ün fich nosch stadi. Cul proget vain l'infrastructura necessaria, in cumbinaziun culs attachs privats, sanada ed optimada. Previs esa da sanar la lingia existenta da chanalizaziun in fuorma d'ün refacziun interna. Pel provedimaint d'aua da baiver vegnan optimats ils attachs privats cun ün nouv concept. Ils s-chavs necessaris vegnan coordinats cun la realisaziun d'infrastructura per l'EW Zernez. Il gremi ha dat glüm verda a l'inizi dal proget e sancziunà la glista da submittents.

SIE Charnadüras 24, Lavin - decisiun da princip e glista da submittents

La via da god Charnadüras a Lavin es in ün nosch stadi e sto gnir refatta. Previs esa da refar la vetta fina e rimplazzar tuot las chünettas. Sper las masüras principalas esa da refar ün mür da sustegn sco eir da realisar üna nouva drenascha per sviar aua da costa. La suprastanza cumünala ha acconsenti l'inizi dal proget e la glista da submittents per las lavurs descrittass.

SIE Val Mela 23/24 - credit supplementar

Illa Val Mela sun d'ürant ils ultims ons gnüdas trattas masüras d'urgenza immediatas per sgürar il traiget a lunga vista. Causa üna bouda d'ürant las lavurs da fabrica ha la suprastanza cumünala deliberà ün credit supplementar da 125'000 chf per quist proget.

Tir chantunal Grischun 2024 - permiss

La suprastanza cumünala ha concess a la società da tregants Zernez il permiss per manar tras d'ürant trais fin d'eivnas i'l mais gün il tir chantunal Grischun 2024.

Büro electoral per las votaziuns federalas e cumünalas dals 3 marz 2024

La suprastanza ha elet il büro electoral per las votaziuns dals 3 marz 2024. Al büro electoral fan part: Domenic Toutsch sco president, Simon Rohner, Armando Roner e Corsin Scandella sco actuar.

Radunanza cumünala - 3 avrigl 2024 - decisiun

Causa mancanza da tractandas per la radunanza cumünala dals 3 avrigl 2024 ha la suprastanza cumünala decis da sdir giò quella e da manar tras la prosma radunanza ils 30 mai 2024.

Statistica sezzüdas, radunanzas e votaziuns 2023

La suprastanza cumünala es gnüda orientada sur da la quantitè da sezzüdas e tractandas da l'on 2023. La direcziun operativa ha trattà 388 tractandas in 23 sezzüdas, la suprastanza cumünala 239 tractandas in 23 sezzüdas. In duos radunanzas cumünalas han votantas e votants decis sur dad 11 tractandas. D'ürant l'on 2023 haja dat trais votaziuns resp. elecziuns a l'urna.

Il Cumün da Zernez ha acconsenti ils seguaints permiss da fabrica:

Parcela no. 2473, Swisscom Schweiz AG, Cuaira – nouv indriz per ün'antenna da func mobil tet sur üna part da la piazza